
SIARAN MEDIA
26 Jun 2025

ECoS Bawa Mesej Keselamatan Elektrik Ke Akar Umbi

KUDAT, 26 Jun - Energy Commission of Sabah (ECoS) telah meneruskan penganjuran Program Kesedaran Pengguna Tenaga Elektrik di Daerah Kudat, melibatkan pemimpin-pemimpin komuniti dari Mukim Dualog dan Tiga Papan.

Menurut Ir. Ts. Ridwan Saham, Ketua Pegawai Operasi ECoS, program ini merupakan inisiatif berterusan bagi mendekati dan menyampaikan maklumat kepada komuniti termasuk di luar bandar dan memperkenalkan peranan ECoS dalam mengawalselia bekalan elektrik dan tenaga boleh baharu. Beliau turut menegaskan kepentingan penggunaan kelengkapan elektrik domestik berlabel keselamatan seperti ECoS-SIRIM, SIRIM-ST atau SIRIM-MUT, bagi memastikan keselamatan pengguna.

Program ini merupakan kesinambungan kepada program kesedaran yang telah dilaksanakan di beberapa daerah lain seperti Ranau, Keningau dan Kota Belud. ECoS berharap maklumat yang dikongsikan dapat disebarluaskan oleh para pemimpin komuniti, sekaligus meningkatkan keselamatan dan kecekapan penggunaan tenaga elektrik.

Program ini dirasmikan oleh Charles William Dabbi, Pegawai Daerah Kudat, dan bertujuan memberi pendedahan berkaitan keselamatan elektrik, penggunaan tenaga secara cekap, pematuhan Enakmen Bekalan Elektrik 2024 serta pengenalan kepada standard prestasi yang ditetapkan oleh ECoS kepada Sabah Electricity melalui penetapan Guaranteed Service Level (GSL) dan Minimum Service Level (MSL).

Dalam ucapan perasmian, Encik Charles menekankan bahawa pemimpin masyarakat perlu mengikuti perkembangan semasa, dan menyifatkan program ini sebagai peluang penting untuk meningkatkan pengetahuan. Beliau menghargai usaha ECoS dan menyeru semua peserta agar memberi perhatian penuh dalam setiap sesi serta menyampaikan maklumat yang diperoleh kepada komuniti kampung masing-masing.

[tamat]

Mengenai ECoS

Suruhanjaya Tenaga Sabah (ECoS) adalah badan berkanun yang ditubuhkan oleh Kerajaan Negeri Sabah sejak 10 Januari 2023. Ia berfungsi sebagai pengawal selia untuk sektor tenaga dalam portfolio Ketua Menteri. Objektif utama ECoS adalah untuk memastikan tenaga yang selamat, mampan, mampu milik, dan mudah diakses untuk Negeri Sabah. ECoS memainkan peranan penting dalam membentuk landskap tenaga Sabah, menggalakkan amalan tenaga yang bertanggungjawab, dan melindungi kepentingan pengguna serta alam sekitar.